

جوز نسانيس



أنا أكثر واحد حبّ يقول لك نفسي أموت

وأفوت من عتبة بابك جوا الروح

وأسكّ الشيش

واتغطى وانام

وأفوت الحلم المتشلق بصمام مسدود،

وأعدّي حدود النخل الشايل جوز عصافير،

والعب وأطير أو يمكن اغير....

م "الضوء الشارد" جوا الليل



أنا عايش كل حياتي ف هم وويل

أنا عامل زي المركب من غير شطّ

أنا شايف نفسي يادوب من ساعة....

” كدّكر البط ”

بيبيض البيضة ويصبر ياما كثير

أنا باصص جوّا الحلم لأبعد خطّ

وح أشوف الصورة كمان محفورة

لواحد غير

أنا شايف صورتي ف ننّ عيونك

حد كبير

أنا أصلي أسير.

أنا أصلي أسير الحرف مع المضمون

أنا مش مجنون.....

مستني أشوف الفرخة بتولد جوز نسانيس

أو حتى غزالة بتعشق فيل

أنا شكلي عليل

والحرف النايح جوا حدودي يهزّ الكون

أنا باحلم بس بعالم يبقى ب لون

وأعاشر ناس بتحب لبعض الخير

أنا شكلي ح أطيير....



وأسافر برّه حدود الحلم، وأنام في البير

واستنى الدمعة النازلة من الأسباط

أنا مش غلاط،..

أنا عاوز بس أعيش من غير تشفير